

Rapport annual 2017 Biblioteca populara Disentis/Mustér e contuorn

Cun plascher mirein nus anavos sin la lavur prestada igl onn vargau. Nus essan perschuidas che la purschida dalla biblioteca contribuescha alla qualidad da viver en vischnaunca e quei dat anim a nus bibliotecaras da buca schar luc cun la lavur e cun l'animaziun tier la lectura. Nossa incumbensa ei da porscher a nossa clientella ed a nossas scolas ina purschida da medias attractiva ed actuala e d'amplificar ella cuntinuadamein.

Activitads en nossa biblioteca

Era igl onn 2017 han puspei differentas occurrenzas giu liug en la biblioteca ed han aschia enrihiu la veta culturala da Mustér e contuorn. Buca il davos ei la biblioteca era in impurtont liug da sentupada per affons da scola, carschi e mummas cun affons pigns.

Cudischs accumpognan nus mintgadi e promovon il svilup digl affon. Aschia lein nus gia animar ils pli pigns tier la lectura ed havein perquei organisau la primavera ed igl atun l'occurrenza da «Buchstart», e quei per affons pigns entochen 3 onns.

L'entschatta digl onn havein nus acquistau in beamer. Cun quel havein nus saviu crear ina nova attracziun per las uras da historias cun Mats, la miur: Il kino da cudischs da maletgs, nua ch'ei vegn raquintau historias cun projectar ils maletgs vid la preit, vegn apprezzias da nos giuven visitaders.

Igl atun havein nus astgau beneventar las scolettas sco era l'emprema e la secunda classa da Mustér e Tujetsch tier in teater da casperets en biblioteca. L'aventura dil casperet ha procurau per egls tarlichonts tier ils affons.

Ei legra nus zun fetg che la gronda part dallas scolas da Tujetsch, Medel e Mustér e da niev era ina gruppa dalla Casa Depuoz visetan regularmein nossa biblioteca. En quei liug in grond engraziel fetg a scolastas e scolasts per la stimada collaboraziun.

Igl onn passau ha la Pro Juventute Cadi purschiu ensemen cun las bibliotecas dalla Cadi in abbonament da famiglia gratuit per las annadas 2012, 2013 e 2014. Las famiglias han fatg stediamein diever da quella purschida, aschia che quella vegn era cuntinuada igl onn 2018.

Las duas prelecziuns "Hanna la Tirolra" cun Linard Candreia (schaner 2017) e "Lanz" cul giuven autur Flurin Jecker (settember 2017) cun ragischs romontschas ein stadas interessantas e divertentas ed ein vegnidas frequentadas bein.

La collaboraziun cun Sedrun Mustér Turissem ei vegnida cuntinuada, aschia ch'ils hosps da Mustér e Sedrun che possedan ina carta da hosps astgan vinavon selegrar digl access gratuit a nossa biblioteca ed alla biblioteca digitala (www.dibiost.ch).

Duront l'jamna bibliotecara Grischuna (settember 2017) havein nus lantschau la concorrenza «book-selfie». Ils participonts han giu l'incumbensa da far in selfie cun in cudisch. Ord 81 fotografias fetg originalas ha la cumissiun bibliotecara lu eruiu la victura Sabrina Sgier. Ella ha gudignau in squitschader da polaroid mobil.

Naven dalla stad tochen la fin digl onn havein nus astgau beneventar ina praticanta en nies miez. Claudia Foppa Caviezel ei lundervi da reactivar la biblioteca dil gimnasi dalla

claustra da Mustér (GKD) ed ha aschia saviu rimnar experientschas en nossa biblioteca. Nus havein giu plascher ch'ella ei stada ina part da nies team.

Giubileum

Madleina Caminada ha astgau festivar siu giubileum da 30 onns bibliotecara. Paucs onns suenter la fundaziun igl onn 1984 eis ella entrada el survetsch dalla biblioteca. Madleina exequescha la lavur cun gronda pissiun ed engaschi, e nus engraziein cordialmein ad ella per la preziosa collaboraziun.

statistica	<i>2017</i>	<i>2016</i>	<i>2015</i>
emprests	12'801	12'254	13'784
novas medias registradas	940	1'024	867
novas entradas	42	51	54
cartas da hosps	35		

Engraziament

Alla fin lein nus engraziar cordialmein a nos gronds e pigns clients. Per lur interess multifar vid la biblioteca, lur marvegliusadad vid nossas novas medias e pils plaids affirmativs, denton era per tips ed inspiraziuns, che nus prendein bugen encunter e che motiveschan adina puspei nus danovamein.

Nus engraziein alla vischnaunca purtadra da Mustér e las vischnauncas vischinontas da Tujetsch, Medel e Sumvitg pil sustegn finanziel dil menaschi bibliotecar, che vegn la finala adabien a nossa populaziun ed als affons da scola dalla regiun.

Tgi che cala da vuler vegnir megliers, cala d'esser buns. Perquei vegnin nus vinavon a s'engaschar cun bia plascher ed elan per esser actuals, per porscher in bien survetsch sco era metter nies focus aunc pli ferm sin nossa clientella.

Susanna Venzin

Curaglia/Mustér, fevrer 2018



il selfie che ei ius cun la plema